

## 每週經課朗誦經文(巴克禮漢羅/教羅)2013/08/11

### 共同經課 - 1 以賽亞書一章一節，十節~二十節

1 當 O-se-a、Iok-thán、A-hap-su、Hi-se-ka，做猶大王 ê 時，A-mô-su ê kiáⁿ，以賽亞所得 tiòh 論猶大 kap 耶路撒冷 ê 默示。10 Lín 所多瑪 ê 官長 ah，tiòh 聽耶和華 ê 話；lín 蛾摩拉 ê 百姓 ah，tiòh 俯耳孔聽咱 ê 上帝 ê 教示。11 耶和華講，Lín 獻 hiah-choē 祭物 hō 我有甚麼利益？公綿羊 ê 燒祭 kap 肥 ê cheng-siⁿ ê 油，我已經飽厭 lah；牛 káng ê 血，羊 á ê 血，山羊 káng ê 血，我 lóng 無歡喜。12 Lín 來朝見我，chī-chūi tui lín 討 chit-ê，來 thún 踏我 ê 院 ah？13 莫得 koh 獻空空 ê 禮物；香料是我所厭惡 ê；月 ê 初一，安歇日，召集 ê 聚會，是行 pháiⁿ；守嚴肅會我忍 boē-tiâu。14 Lín ták 月 ê 初一 kap 節期，我 ê 心怨恨，看伊做重擔，hō 我擔 boē 起。15 Lín kiáh 起手，我 beh 掩目矚 m̄ 看 lín；lín choē-choē 祈禱，我也 m̄ 聽；lín ê 手滿滿 thài 人 ê 血。16 Lín tiòh 洗來家己清氣；tui 我 ê 目矚前除去 lín 所行 ê pháiⁿ；soah lín ê 做 pháiⁿ；17 學習行好，chhē 公平，拯救受壓制 ê，kā 無父 ê kiáⁿ 申冤，為守寡人辯護。18 耶和華講，Lín 來，咱相 kap 辯論；lín ê 罪雖然親像朱紅，beh 變白親像雪；雖然紅親像胭脂，beh 白親像羊毛。19 Lín 若甘心聽 thàn，beh 得 tiòh 食地上 ê 好物。20 若 m̄ 聽 thàn，反 tng 悖逆，beh 受刀劍吞滅；因為耶和華親嘴講伊。

### 共同經課 - 2 詩篇五十篇一節~八節，二十二節~二十三節

1 A-sat ê 詩。1) 全能 ê 上帝耶和華有講出話，來召天下；Tui 日出到日落 ê 所在。2 Tui 齊全 sui ê 錫安，上帝有發出光。3 阮 ê 上帝 beh 來，決斷無靜靜；有火 tī 伊 ê 面前 teh 燒，有風 tī 伊 ê 四圍真透。4 伊 beh 叫頂面 ê 天 kap 地；為 tiòh beh 審判伊 ê 百姓；5 講，tiòh 招集我聖 ê 百姓來我 chia，就是 hiah-ê 用祭祀 kap 我立約 ê 人。6 Chiah-ê 天 beh 顯明伊 ê 公義；因為上帝本身是做審判 ê。[Sè-láh]7 我 ê 百姓 ah，lín tiòh 聽，我 beh 講；以色列 ah，我 beh 警戒你；我是上帝，你 ê 上帝。8 我無因為你 ê 祭祀責備你；你 ê 燒祭常常 tī 我 ê 面前。22 Lín boē 記得上帝 ê 人，tiòh 想 chit-ê 事，免致我將 lín 拆碎，無人拯救。23 見若用感謝獻做祭 e，就是榮光我；謹慎行 e 人，我 beh hō 伊看見上帝 e 救恩。

### 共同經課 - 3 希伯來書十一章一節~三節，八節~十六節

1 信就是所 òng 望 ê 實在，kap 未看見 ê 事 ê 憑準。2 因為 tī chit-ê，就古早人有得 tiòh 干證。3 Tui 信，咱知 chiah-ê 世界是 tui 上帝 ê 話來造成；án-ni 所看見 ê m̄ 是 tui 能看見 ê 來成。8 Tui 信，亞伯拉罕受召 ê 時，就順命令出去，到將來 beh 得 tiòh 做業 ê 地；伊出去，m̄ 知 beh 去 tá-lòh。9 Tui 信就出外 tī 所應允 ê 地，親像 tī m̄ 是家己 ê 地，khiā 起 tī 布棚，kap 以撒、雅各，就是 saⁿ-kap 承接同一樣 ê 應允 ê；10 因為伊 òng 望有地基 ê 城，是上帝所經營起造 ê。11 Tui 信，撒拉，sui-bóng 過生產 ê 年歲，iáu 得 tiòh 能懷孕，因為伊掠應允伊 ê 做信實；12 所以 tui 一人，koh 是親像已經死 ê，生淡親像天星 ê choē，親像海沙 ê boē 算得。13 Chiah-ê lóng 是照信來死，未 bat 得 tiòh 所應允 ê，獨獨遠遠看，歡喜來等接，koh 家己認 tī 地上做人客，做出外 ê。14 因為 án-ni 講 ê，是表明 in teh chhē 一個祖家。15 In 若 siàu 念所 tui hia 出來 ê 地，就有 thang tò 去 ê 機會。16 總是 taⁿ in 欣慕 koh-khah 好 ê，就是 tī 天裡 ê；所以上帝稱做 in ê 上帝，無掠做見笑；因為已經替 in 備辦一個城。

### 共同經課 - 4 路加福音十二章三十二節~四十節

32 Lín 細 ê 羊群 ah，莫得驚，因為 lín ê 父歡喜用國 hō lín。33 Tiòh 賣 lín 所有 ê 來賑濟人；為 tiòh lín 本身備辦 boē 會舊 ê 錢袋，tī 天裡用 boē 了 ê 財寶，就是賊 boē 到，蟲 boē 蛀 ê 所在。34 因為 lín ê 財寶 tī hia，lín ê 心也 beh tī hia。35 Lín ê 腰 tiòh hâ-teh，lín ê 燈 tiòh 點 teh；36 lín tiòh 親像人 teh thèng 候 in ê 主人 tui 婚姻 ê 筵桌 tò 來；到 tè phah 門 thang liâm-piⁿ kā 伊開。37 主人到，看見 in 警醒，hiah-ê 奴僕有福氣。我實在 kā lín 講，主人 beh hō in 坐桌，家己 hâ 帶，進前來伺候 in。38 Kiám-chhái 二更 á 是三更到，看見 in án-ni，hiah 奴僕有福氣。39 家主若知賊甚麼時 beh 到，伊就 tiuⁿ-tī，不致伊 ê 厝受 iah 孔，這是 lín 所知。40 Lín 也 tiòh 備辦便，因為 lín 無 phah 算 ê 時人子來 lah。